

四庫全書

史部

欽定四庫全書

史部

江南通志卷一百六十八

詳校官給事中<sub>臣</sub>丁雲錦

檢討<sub>臣</sub>德生覆勘

總校官編修<sub>臣</sub>王燕緒

校對官助教<sub>臣</sub>卜維吉

謄錄監生<sub>臣</sub>劉本立

欽定四庫全書

江南通志卷一百六十八

人物志

隱逸

江蘇松常鎮淮揚徐八府太通二州

江寧府

晉葛洪字稚川句容人性寡欲好異書尤耽神仙導  
養之法屢避功賞授官皆不就以句漏產丹砂求  
為其令至廣州刺史鄧嶽留之止羅浮山著書名

抱朴子

南北朝梁陶弘景字通明秣陵人神儀明秀讀書萬  
卷永平中上表辭祿止句曲山自號華陽隱居築  
三層樓弘景處上弟子居中賓客至其下梁武帝  
早與之游即位後恩禮逾篤謚為貞白先生

阮孝緒字士宗陳留人出繼從伯印之居建鄴祖  
母遺財百萬不納悉歸其姑性至孝于鍾山聽講  
母王氏忽有疾兄弟欲召之母曰孝緒至性冥通

必當自到果心驚而反天監二年徵不至南平王  
偉以書要之不赴曰非志驕富貴但性畏廟堂若  
使磨處可驂何以異夫驥騄鄱陽王妃孝緒姊也  
王嘗命駕就之鑿垣而逃著高隱傳

唐余延壽開元中處士以詩名

韋牟上元人號遺名子隱居鍾山飄然有物外之  
趣顏真卿書其室曰三教會宗堂

陳融六合人幼有至性言若不出諸口游止皆有

常處好學不仕卒謚貞晦先生

元王德昇句容人讀書有儒者氣象至正間累辟不起

朱南強句容人多學善屬文隱居不仕德化鄉里所著有黻醜稿同時侯蕃丁復皆有高名

明居仁句容人洪武初以儒碩徵入朝與對奕賜以內醞辭職不就歸隱於家人稱瞻萊先生

王顯江寧人號溪漁子雄才尚俠後忽悔所為買

書數千卷閉門誦讀不問世事方孝孺稱為奇士  
賀碓字存誠居金陵少事博士業一不利即棄去  
肆力經史百家天文地理醫卜之書論古今事如  
倒囊出物聞者聳聽曾薦修宋遼金三史辭不就  
龍瑄字克溫才名籍甚與丘濬陳獻章為布衣交  
自號半閒居士顧璘作半閒居士傳

史忠字廷直性任俠不羈薄權貴有不合輒引去  
遇所善則留連忘懷自號癡翁作卧癡樓於冶城

之麓意到便行不告家人以所往沈石田贊其像  
曰玩世滑稽風顛月癡洒筆淋漓水走山飛

金琮字元玉自號赤松山農遐嘯清視人莫能窺  
書法精工文徵明裝潢成帙題曰積玉

孫自修字無修江寧人天啓甲子舉人授陽江令遷  
貳大同感時亂忽盡遣愛妾棄家祝髮縛茅於人  
迹罕至處擔柴負重以自給其子間關往省敕斷  
家事以學道讀書誨勉而已



李克愛字虛雲天性沈篤卜居長干里與李義人  
張興公論學稱南郊三老

孫石字介臣上元人宿學有聲歲貢不仕抱道靜  
居足不踰戶論者謂之真隱

周維藩字覺菴上元人讀書不仕著史鑑闡微易  
學宗旨等書晚年精于內典

張怡字瑤星為諸生父可大以總兵官盡節登萊  
蔭怡錦衣千戶甲申流寇陷京師逼怡降怡不屈

械置複辟中乘間逸歸築室攝山白雲峰以終老  
國朝謝璣字在之上元人明季歲飢區畫育嬰賑粥諸  
事却憲張瑋以璣有濟世才薦於朝堅辭不就隱  
居龍溪

王應憲字德卿上元人少負奇氣文行聞於鄉隱  
居著述有河漕水利鹽鐵諸考壽登大耋

程京萼字韓老上元人能詩文尤工書法頗自矜  
重然故交付以舉火者應之無吝色

蘇州府

周披裘公吳人延陵季子見路有遺金呼薪者取之  
薪者瞋目曰何子居之高視之下儀貌之壯言語  
之野也五月披裘而薪豈取金者哉季子謝之請  
問姓字曰子皮相之士也何足語姓名竟去

漢角里先生姓周名術泰伯之後漢高帝時與東園  
公綺里季夏黃公俱出定太子號四皓今太湖洞  
庭山有角里村

龍邱萇王莽時隱居於吳更始立任延為東部都尉折節下士主簿鍾離意請萇為門下祭酒延曰龍邱先生躬德履義都尉洒掃其門猶懼辱之何言召因修書致藥吏使相望於道積一歲萇乃詣府署議曹祭酒

晉張翰字季鷹吳人性任達時號江東步兵齊王同辟為東曹掾因秋風起思吳中菰菜蓴羹鱸魚膾遂命駕歸棲隱不出俄回敗人謂見幾性至孝遭

母憂哀毀過禮

唐陶峴晉徵士淵明後開元中居崑山文學可以經  
濟自謂疎脫不謀宦達製三舟一以自載一置賓  
客一貯飲饌有女樂一部奏清商曲逢佳山水必  
窮其勝經過郡邑靡不招延獨不肯詣王公貴人  
山水浪迹三十餘年吳越之士號為水仙

陸龜蒙字魯望吳人元方七世孫居甫里多所論  
撰得書熟讀讎比勤勤丹黃不去手有田數十畝

屋二十楹田苦下雨潦則與江通故嘗苦饑身親  
畚鍤所居前後植杞菊與皮日休輩往來時乘小  
舟齋書一束筆牀茶竈自隨時謂江湖散人累召  
不出光化中韋莊表贈右補闕

徐修矩吳人持身介潔守遺書萬卷草屋十餘椽  
優游自適皮日休嘗就借書讀之時有涇縣尉任  
晦亦同縣人高放寡合退處里中顧辟疆園有深  
林曲沼皮日休陸龜蒙嘗過從焉皮陸竝有二游

詩

宋吳江漁翁不知何許人嘗櫂舟往來波上嘯傲自得扣舷而歌閩中潘裕自京回道吳江遇而異之與語知其高尚因勸之仕翁曰出處由人吾不能追園綺之高竊慕老子曲全之義裕嗟歎問所處曰吾姓名尚畏人知况居室邪鼓枻而去

侍其沔字國紀吳人博通經傳五舉禮部退為鄉先生與人交殊淡泊遇急難奮義以往不避艱險

治平三年卒門人私謚曰夷晦先生

閻邱孝終字公顯長洲人嘗知黃州未幾掛冠歸  
與崇大年輩以耆德稱蘇軾謫黃時與孝終友善  
過吳嘗飲酒賦詩其家有云蘇州有二邱不到虎  
邱即謁閻邱

胡稷言字正思吳人少學文於宋祁受經於胡瑗  
以特奏補官山陰丞不能究其所施遂乞致仕即  
臨頓里陸龜蒙故址築圃鑿池追陶靖節之遺風



作五柳堂終隱以老子嶧姿稟淳慤恬於榮利步  
趨言動皆有尺度人目為隱君子詩文簡古嶧子  
百能紹興進士知江山縣有惠愛以年至請錙銖  
軒冕有祖父風

楊懿儒字彞甫長洲人少孤力學言行相顧任真  
自信不知世間有傾巧事崇寧間為南昌簿一歲  
忽載妻子歸吳高隱不入州縣與方惟深稱吳中

二老

鍾璇字振遠常熟人於書無所不窺嘗游台州巖谷間遇異人持列禦寇書揖而與坐磐石指一泓定水曰此水滔滔乃皇極大中之道語久別去自是有悟築室梅里二十年不出戶范成大薦於朝不報有續白孔六帖

顧禧字景繁吳人隱居光福山中閉戶誦讀所著書甚富注蘇軾詩尤詳紹興間郡以遺逸薦不出章康字季思吳人嘗問學於朱子默有所契隱居

吳城西安貧樂道足迹未嘗越州境而四方之人  
無不知有章季思者

盛明遠吳江人咸淳六年鄉薦為廣州錄事判官  
宋亡隱居不仕元世祖聞其名召判惠州自以世  
受宋恩辭不就詔書迫責乃變姓名從老氏以終  
同邑孫銳字穎叔咸淳七年舉於鄉宋亡遂不復  
出隱居平望之桑樂村林泉頗勝賦詩寓意又沈  
姓字自得吳人宋上舍生江南內附乃構山房著

道士服隱迹終身皆宋之遺民也

元黃公望字子久號大癡道人本常熟陸氏少喪父  
母依永嘉黃氏遂因其姓補浙西憲掾以忤權豪  
棄去黃冠野服往來三吳博洽羣書於技能無不  
通曉尤精山水師董源巨然後稍變其法自成一  
家所著山水訣世多宗之

素易字通甫長洲人為石洞書院山長歸隱吳淞  
之濱趙孟頫最重之作卧雪圖以贈所著有靜春

堂稿

張介福字子祺自懷慶徙吳中少受學於許衡二  
親早終遂無仕進意張士誠入吳介福恐亂兵發  
先瑩往廬焉士誠聞其名欲招致之不可饋之力  
辭病且死謂其友曰吾志慕古人未能萬一惟無  
汚於時庶幾哉遂卒

湯公雨字均澤性淳篤有學行工詩至正末由江  
陰徙居於虎邱之山塘隱居不仕以吟咏自娛詩

載四朝詩中

明謝常字彥銘吳江人洪武時舉秀才召見試丹鳳  
朝陽賦稱旨帝欲官之以母年百有六歲辭歸終  
養隱居震澤東溪

陳汝秩字惟寅吳縣人少失怙安貧樂道力學工  
詩書得二王筆意高亢不苟交與唯授徒自給洪  
武初以人才徵辭養母歸卒

韓奕字公望吳縣人少目眇筮得蒙卦知眵難療

遂以蒙齋扁室絕意仕進博學尤工於詩洪武中  
與王賓皆隱於醫賓為郡守姚善所禮乃因賓造  
訪之奕於布簾內答云不在一日伺賓入室亦掩  
入之則走楞伽山善隨至又泛小舟入太湖善歎  
曰韓先生所謂名可聞身不可得而見也

錢芹字繼忠吳縣人勵志操以奇節著吳中郡守  
姚善欲見之芹曰我民也無所置身乃請會於學  
宮就質經義芹曰此經生業耳豈無今日之急務

乎善拜問出袖中一簡授之而去啓視之皆戰守方略也後善死於靖難芹亦與焉

范能字仲能崑山人少從毘陵謝應芳游稱入室弟子精醫喜吟尤工書法永樂初被徵賦詩上郡守願養母全其天年守憐而許之以著述為事同里孫俊字叔英能高第也工詩不慕聲利有南溪草堂集葉盛為之序

邢量字用理長洲人隱居葑門以下自給陋室三



間讀書不輟尤工詩吳寬極重之郡守或請其詩  
量曰古有采詩無獻詩吾宜以為羔鴈哉因削其  
稿後有吳人索景休字孟逸善為歌詩芒屨竹笠  
徧游吳越山水歸而受一廬於吳市以賣卜終老  
詩多不屬草林若撫口授其遺詩存二百餘首

邢參字麗文長洲人終日杜門誦讀一室立士行  
講授里中以醇和稱貧無以朝夕泊如也徐貞卿  
諸君皆與游嘗遇大雪訪之則屋三角滲雪參坐

一角不滲雪處怡然讀書苦吟自若

沈周字啓南長洲人祖孟淵父恒吉皆高隱周學於陳五經之子孟賢得前輩經學指授嘗以賢良薦筮得遊之九五遂耕讀於相城里所居曰有竹莊畫法董源書法黃庭堅詩出入於杜甫白居易之間興至對客揮灑煙雲滿紙畫成自題其上頃刻數百言風流文翰照映一時百年來東南之盛莫有過之者

史鑑字明古吳江人博洽好學執古信禮尤熟於  
史論千載事歷歷如見網羅舊聞筆之成編有洪  
邁之博詩力追魏晉家居水竹幽茂客至陳三代  
秦漢器物及唐宋以來書畫相與鑒賞好著古衣  
冠曳履揮麈望之者以為列仙之癯也少受知於  
徐有貞與吳寬沈周為友及歿寬表其墓

陸治字叔平吳縣人善繪事倣宋人而時出己意  
築室支硎山下藝名花數百種翛然自怡詩律秀

潤

王綸字理之崑山人以儒臣薦預修武宗實錄善  
詩工畫為沈周入室弟子尤工篆隸楷法得歐陽  
詢筆意

朱鷺字白民吳縣人家貧授徒養親牀頭恒貯數  
十文曰買笑錢善畫竹寸楮尺素人爭寶之每談  
及靖難諸君子輒泣下網羅遺事作建文書法

居節字士貞吳縣人少從文徵明游詩律書畫徵

明之門未之或先也家故隸織局織監孫隆聞其名召見不肯往拘繫破家餓居半塘落落寡合每過晨未舉火吟嘯自若也詩名牧豕集為藝林所稱

岳岱字東伯長洲人闢草堂於陽山白龍塢花木翳然修竹萬竿自稱秦餘山人性狷介不妄與人交能詩善畫嘗輯其一時友朋之詩倣篋中中州集之例序而傳之曰今雨瑤華

顧元慶字大有長洲人家近滸墅所居曰顧家青山藏書萬卷擇其善本刻之自經史以至叢說多所纂述年七十餘猶吟誦不輟岳岱曰陶潛田家之言浩然江湖之句時代雖殊旨趣相符時稱為大石山人

趙宦光字凡夫吳縣人讀書稽古精於篆書與婦陸卿子隱於寒山足不入城市當事慕其名多造門求見者宦光亦不下山報謁子均字靈均傳其

父六書之法日與賓客搜金石論篆籀問奇字訪  
逸典為藝林所稱

周詩字以言崑山人喜讀書倜儻重然諾兼精醫  
作內經解游京師詩文播公卿間少試方藥輒效  
欲以尚醫官之拂衣去游武林匿影僧寺遠督學  
孔天印閱岳王題壁得詩作大驚命駕往謁與定  
交武林人爭延致之不懌辭歸隱不復出

已捷字警幾吳江人崇禎壬午舉人流賊陷京師

削髮入穹窿山足迹不入城市

國朝楊補字無補長洲人少貧工詩畫為人孝謹重然諾隱居鄧尉山以操行高潔稱

徐枋字昭法長洲人明季舉人自少孺染家學湛深經術痛父汧殉甲申之難隱居靈岩山之上沙五十餘年雖窮餓餽遺不受間作書畫以自給巡撫湯斌知其賢屏騎從兩詣山中訪之不得見年七十三卒



戴笠字耘野吳江諸生入秀峰山為僧旋返初服  
隱居朱家港教授生徒土屋三間炊煙時絕編纂  
不輟笠同縣諸生徐白字介白隱靈岩山之上沙  
種蔬藝果掘拾自給詩畫蕭疎無俗韻故舊至掃  
葉煮泉三十年不出

史兆斗字辰伯長洲人少棄諸生好古力學博通  
前明典故下至故家遺老流風軼事無不備熟尤  
喜蓄異書所購率皆祕本或手自繕錄積至數千

百卷齋居校讎輒為疏注其旁年八十餘卒汪琬  
為之傳

金俊明字孝章吳縣人棄諸生混迹詩人詞客間  
工書善畫墨梅論者擬之鄭思肖之蘭云子侃字  
亦陶亦工書畫能詩杜門鈔書校讎精審宋元人  
名集祕本插架甚富

文點字與也長洲人震孟孫幼能詩叔垂殉甲申  
之難家盡破依墓田以居肆力詩古文詞間寫山

水人物巡撫湯斌嘗屏車騎訪之問及餽粥計對  
曰菜羹蔬食足以安人性情堅人操行少或有餘  
將移所守斌稱善從弟掞字賓日和州教授嘉之  
曾孫清修古行閉門不輕與世接哦詩染翰自娛  
以老

顧苓字云美長洲人少篤學尤潛心篆隸凡碑版  
及鼎彝刀尺款識魚蟲科斗之書皆能誦之臨摹  
秦漢銅章玉印見者以為不減吾衍云

褚篆字蒼書長洲諸生邃於經學能作擘窠書已

郊

聖祖南巡召見吳中耆碩於行在篆書行草各一幅蒙

嘉獎賜海鶴風姿四大字時年九十三矣

王武字勤中吳縣人鑿六世孫工詩尤長於畫先

世所遺及購獲宋元名蹟心摹手追悉能冥會高

潔蘊藉嘉遜邱園汪琬為之傳以為吳中老成典

型其風尚標格與前明杜瓊沈周陸治相伯仲云

司馬荇字磐莊長洲人受易於休寧程智傳極數  
辨物之學年九十餘卒有語錄若干卷

俞瑒字犀月長洲人通經史上下千百年徵引考  
據原原本本如燭照數計顧嗣立選元詩注韓愈  
溫庭筠集商榷為多

陳逢午字方中常熟人篤行好學不苟言笑及語  
道義輒極論終日不倦教子讀書以立行為重曰  
當知文藝外大有事在所著詩文甚富兼工楷隸

松江府

宋王奎華亭人風韻高邁慕神仙遐舉之道自號蟾谷真士嘉定寶慶間再徵不起

謝國光字觀夫華亭人宋亡不仕元治書侍御史程鉅夫奉詔使江南搜訪遺賢以國光薦杜門稱疾堅辭不赴棲隱終身

衛富益華亭人宋亡設壇祭文陸死事諸人詞極悲愴隱居教授不應有司之薦後攜子避地雪上

卒年九十六

元曹知白字又元華亭人大德中薦授崑山教諭不就嘗游京師諸公欲奏辟之謝曰吾豈齷齪求官者邪即日南歸隱居讀易足不踰戶人稱貞素先生畫亦列能品

楊謙字竹西華亭人讀書尚志不樂仕進多高人勝士之交嘗築小樓登眺海中小金山題曰不礙雲山樓楊維貞貝瓊俱為歌咏

陸厚華亭人宅東有圃自號東園散人博洽經史  
元季避亂浙中兵息返故廬日放浪峰泖間善按  
摩法療人疾有詩號古漁唱

孫稷字長慶華亭人言行謹飭嘗舉為文學官兵  
興遂不仕築室橫雲山之支隴名曰小山招隱讀  
書賣藥以終老

儲泳字文卿華亭人與弟游隱居周浦竝以詩名  
唐時字中甫華亭人幼遭親喪哀毀盡禮及長以



先世受宋恩誓不出仕至正末張士誠陷郡杜門  
自守以壽終

陸居仁字宅之青浦人泰定中舉於鄉工詩古文  
隱居教授自號雲松野衲與楊維貞錢惟善稱三  
高士

楊德懋華亭人明左氏春秋尤究心太極圖諸書  
買田澱山西躬耕不仕洪武初詔徵天下賢才有  
司薦聞德懋既遜言辭召竝自眇左目以示廢疾

不可用優游湖上卒里人稱為自廢公

明錢全袞字慶餘華亭人通涉經史元季張氏據吳全袞隱居盤龍岡不為其用洪武中卒所著有續松江府志諸書

焦伯誠華亭人潔身修行事母孝通五經鄉會試聘典衡文皆辭疾不赴教授於鄉門人多顯者

黃鑑字明夫華亭人博學而貧三十未娶進士李萱慕其賢以女妻之鑑悉却奩具夫婦織紵自給

晚年結茆于山曰八峯小隱所著有山樵傳說門人錢福為立傳

張初字大初華亭人少游文徵明門長於詩兼工書畫晚居沙岡墓廬四十年不入城市家日益貧意泊如也同邑陸尚書樹聲以雲間伯夷目之人皆稱貞白先生

王嗣響字霆叔華亭人以淹邃為時所稱性耿介侍郎唐文獻通政許樂善皆少與同學及貴顯後

過從輒不見有所贈亦不受取古人窮堅老壯二語自號兩益居士

俞寰字允寧華亭人喜讀書工詞賦醫卜篆刻無所不能而不求人知居青村終歲不一入城府

李世邁字懷古華亭人少慕高隱明末棄經生業構室高槐古梅中竹爐泉茗興至鼓琴一再行聞雨滴芭蕉聲則喜而不寐授徒自給硯田有贏則以助葬贍嫠

國朝張若羲字昊東華亭人明季進士仕泉州推官擢主事歸而棲隱郊墅四十年自號味閒漫樵郡守直指欲薦舉隱逸堅辭不就閉戶著書以終子豫章探花及第翹進士俱有文譽

王光承字玠右華亭人歲貢生博學工詩文才名籍甚淡於榮利明季屢辭徵辟不就後偕弟烈字名世隱居上海之新場鎮躬耕養父足迹不入城市者三十餘年無子依壻楊檐以沒所著鑑山堂

集外孫日徵收輯之

莫秉清字子先華亭人明布政如忠曾孫蚤歲為諸生有聲明季避兵浦東遂隱焉性耿介不妄交人造廬者亦罕得見博覽載籍所著詩文甚多

吳騏字日千華亭人明季為諸生有盛名與王光承兄弟結深契明亡以後屏迹荒山光承稱騏堅苦自守三旬九食五月披裘侮之不怒周之不受為得其實云著有頤頤集

沈浩然華亭人明兩廣總督猶龍子府學生有雋  
才閉戶讀書不樂仕進雖饗殮不繼處之晏如工  
八法為時所重稱雪峰處士

蕭中素名詩以字行華亭人隱於匠高致絕俗詩  
最有名曰釋柯集

諸嗣郢字乾一青浦人順治辛丑進士居細林山  
自號九峰主人徧搜諸勝作九峰志康熙九年十  
九年郡大祲設粥廠以拯飢者

常州府

漢陸瓊字仲芳毘陵人明京氏易尚書尤精風角星  
算辟主簿謝病去隱會稽山

南北朝梁蕭眎素惠開子性靜退仕梁累官中書侍  
郎求為諸暨令到縣十餘日挂冠縣門而去獨居  
屏事非親戚不得至其籬門武帝嘗賜錢八萬一  
朝散之親友

唐魏璞字不琢毘陵人才高志放隱居三十年與皮



日休陸龜蒙善每秋風時乘舸載酒相往來當世  
高之

宋王克嶷宜興人隱居不仕王安石高其節贈之詩  
有先生醉卧松花裏春去人間總不知之句

張舉字子厚常州人登進士養親不仕窮經著書  
四十年元豐元祐間廷臣厯薦不起卒賜諡正素  
先生

孔元度至聖五十二世孫建炎時五世祖若罕與

子端志俱高抗不仕元虔淳祐間避居沙上號馬  
洲書院教授生徒

包天麟字仁甫江陰人咸淳間舉博學宏詞科不  
就嘗註詩書易春秋傳義元旌其門贈浙江儒學  
提舉

元蔣捷字勝欲宜興人德祐中進士元初晦迹不仕  
大德中憲使臧夢解陸垕俱薦其才不就博學工  
詞學者稱竹山先生

許恕字如心江陰人家北郭號北郭先生部使者  
薦授澄江書院山長不就兼工醫術有北郭集

李時可元末居馬馱沙楊維貞客其家供饌華美  
歌舞極一時之盛明祖下江南助軍餉萬石後以  
巨筏浮海去不知所終

明倪瓚字元鎮無錫人工詩善書畫所居有閣曰清  
閟藏書數千卷古鼎法書名琴奇畫陳列左右高  
木修篁縈繞其外四方名士日踵其門自號雲林

居士家故雄於貲至正初悉散給親故兵興後扁舟箬笠往來震澤三泖間張士誠兄弟屢欲致之不可得及吳平黃冠野服以終年七十四

焦先生不知其名家江陰之虞門里太祖故人洪武初詔有司徵求甚急恐為有司累乃持雞酒馳甬道入見太祖班坐對飲如微時賜以金玉角三帶取角者陰於戶後挂之去人比之嚴光

華晞顏字以愚無錫人元末不仕洪武初辟為本

府訓導不就以老病辭隱居東湖

李大椿字茂卿無錫人博學工文隱居梁鴻溪洪武初詔為御史力辭附使者上太平十二策

杏林叟不知其名或云姓董隱居暨陽山遇異人授以鍼術能立起人危疾謝以貲不受但令人種杏一株久而成林高啓為作杏林叟傳

張機字子樞郡人託漁自隱多行陰德高啓有澄江嬾漁記

華宗翰字公愷無錫人博綜經史元季兵興奉親  
往來蘇松間事平還錫修身教家集古人嘉言懿  
行為一書曰慮得集洪武中屢徵不起

王文晏字文靜宜興人元季兵亂隱居不仕以吟  
咏自娛舍旁皆植梅自號梅西詩詞清麗書畫師  
宋克王蒙皆造其妙洪武中以賢良徵辭疾不就  
吳綸字大本宜興人風神散朗操履修潔非公事  
未嘗一入城府創別墅二於溪山間南曰樵隱西

曰漁樂以陶潛自擬因自號心遠居士

秦旭字景暘無錫人詩格類陸游晚集諸高隱觴詠慧山之麓名曰碧山吟社凡十人年皆七十八十衣冠甚偉望若神仙好事者繪圖傳之

尤文字務樸無錫人居東郭回溪里學以宋儒為宗領鄉薦即隱居不出孝宗遣行人齎書徵之以母老力辭胡濙周忱交薦之終不就又邑人許世卿有孝行亦以孝廉隱居不仕守令不得覩其面

有中解編諸集

薛章憲字堯卿江陰諸生工詩古文吳人都穆擬之商彝周鼎性喜佳山水意到輒輕數千里赴焉居賓坐中斂肱默坐貌古神清

謝邁字彙先宜興人父三錫家貧力學以樸誠率後進邁崇禎癸酉鄉舉內行修飭鄉評稱為真孝廉中年杜門與沛縣閻爾梅長洲徐枋並持高節雅好施與知交匱乏多待以舉火著述甚富尤邃



于易詩

徐弘祖字霞客江陰人性好奇徧遊天下名山水  
遊屐所紀不加點綴曲盡勝趣嘗上華山心動馳  
歸母正屬疾服闋入閩出微外欲窮探河源歸竟  
不食卒

許肇麓字壩友宜興人弱冠知名博學工文章意  
氣豪逸明季棄諸生放浪吳越間為詩自娛

蔣偉字韋人宜興人工詩嗜酒乞詩者必載酒詣

之酒盡詩立成各滿其意其不以時請者輒漫罵之聲若巨雷身長七尺學使者奇其貌令作蟋蟀賦立成閱之稱善曰子誠材然令後世惜之者必子也後棄諸生自溷於酒詩亦日益奇晚有故人子入滇送之江上吟咏連日歸而卒

國朝吳璇字叔度宜興人幼立品行恥儕流俗為諸生時巡按御史以端方薦後舉崇禎癸未進士差理江北餉驅游兵立保甲銀不入庫解不越宿史可

法特薦之入

國朝足迹不入城市閤部交薦不就同里吳永祺字文剛為人孝友能周卹宗黨立品與璇相似

孫夢簡宜興諸生篤孝友隱居教授生徒以紫陽山學為式邑令欲識其面謝不可雅慕倪瓚為人卒時命以瓚畫幅殉

陳貞慧字定生于廷子少在復社有名阮大鍼以逆案久錮謀復用貞慧與池州吳應箕無錫顧杲

等草檄攻之後大鉞起南都侍郎乃以他事屬鎮撫司逮治尋得脫屏居故里坐卧一小樓不入城市十二年而卒

李介立江陰人明季詣闕獻策不報遂徧歷天下山川而歸老居僧舍貧困不支邑令聞名訪之匿不見終身不婚卒友人陳其忠葬之

惲格一名壽平字正叔武進人生而敏慧八歲咏蓮花驚其長老尤工繪畫花卉蟲鳥意態飛動而

題語書法兼工故世稱南田三絕為人孝友敦篤  
不謁當事有古君子風晚與同里五君子聯吟稱  
六逸五人者高士胡香昊字芋莊經師陳鍊字道  
氣諸生楊宗發字起文董大倫字敷五唐憚宸字  
仲元也

朱應鼎字凝和靖江人為人端重方嚴教授鄉里  
從游者多以文行著聞

### 鎮江府

漢焦先字孝然本河東人隱居京口之譙山世傳焦山以先得名然無可徵

南北朝宋闕康之字伯愉河東揚人居京口屢辭徵辟顏延之等十人入山候之見其散髮席松葉枕石而卧了不相盼延之等咨嗟而退為毛詩義疑滯多所釋尤善左氏春秋又造禮論十卷齊高帝絕賞愛之

齊臧榮緒幼孤貧灌園自給純篤好學括東西晉為

紀錄志傳百一十卷隱居京口不受朝命與關康之號京口二隱

梁諸葛璩字幼孜琅邪陽都人世居京口幼事關康之博涉經史復師臧榮緒榮緒著晉書稱璩有發擡之功方之壺遂建武初徐州行事江祀薦璩為議曹從事不就

馬樞字要理博洽羣書尤善周易老子邵陵王綸為南徐州刺史引為學士曰吾聞貴爵祿者以巢

由為桎梏愛山林者以伊呂為管庫東名實則芻  
芥柱下之言玩清虛則糠粃席上之說稽之篤論  
亦各從其好也乃隱於茅山親故竝居京口秋冬  
之際時往游焉

宋邵餗丹陽人范仲淹王淇相繼守潤以餗守道邱  
園素有節行屢薦之不就賜號冲素處士

陳輔丹陽人少負雋才不事科舉自號南郭子與  
王安石交善安石用事絕不與通孤介寡合古之



獨行者也

蘇昭字元晦丹徒人隱居藏修自號東山樵隱趙  
磻老以遺逸薦於朝時相以隱逸之人宜遂其高  
書滄浪二字遺之

李迴字叔友丹徒人高尚不仕士林宗之董奚白  
太守虞奕曰治下有隱君子盍訪之虞曰願之久  
矣乃攜具偕董詣迴迴野服見之明日以詩謝不  
至其門

周方叔字矩道高郵人隱居潤之五州山讀書自  
娛或終日不食鄰僧乞米送之一日農卿龔集常  
州孫吳會同造其廬無以為具乃以藜羹食客二  
公欣然盡歡而去

孟逢大丹徒人弟逢原竝以道德名世講業者百  
餘人王龍澤陸秀夫皆其弟子人稱大小孟先生  
皆不仕

陳膺字登父居京口剛毅寡合入元隱居教授自

號薌林子

明丁熙拱字伯輝丹徒人樸茂有古風太祖駐蹕北  
固山召見多擢用者熙拱獨以老疾辭

茅濤字平仲丹徒人幼好學不求聞達閉戶著書  
有韻譜本義行世與鄔佐卿輩倡和稱詩以布衣  
老於家

王墜金壇人讓產庶弟屏居一室潛心理學中丞  
周孔教薦之朝辭不起

芮城字巖尹潁陽諸生少負異才志在立行明末  
謝弟子員學耕山中故人有顯者訪之避不見貽  
書候問亦不發曰吾山澤之癯一與貴人接便喪  
所守時人目為真隱所著有易象傳解四詩正言  
禮記通識綱目分注拾遺與白盤山湯泰亨相析  
疑問義泰亨亦隱士歲遇君親子郊日則屏食堅  
卧不起年八十五自知逝期別親友手題墓志沐  
浴而逝

王鎰字叔聞金壇人樵諸孫歲貢生以詩名明末晦迹酒人牢愁悲憤不求人知人亦無知者後之選家或稱為王遺民

王元綜字闇然鎰從弟明末棄舉子業以醫濟人貧者亦與上藥不取償終身野服有隱操

### 淮安府

宋龔開字聖予淮陰人宋亡不仕家貧甚客至無几席子浚每俯伏榻上就背按紙作唐馬圖人輒以

多金購之嘗為文天祥陸秀夫作傳甚稱於時

明田潤字德潤安東人隱居教授雖結廬陋巷而門  
多長者車轍以琴詩自娛人皆高之

國朝宋曹字邠臣鹽城人長於論事工詩兼善書法栖  
隱射陽之濱自號耕海潛夫初詔舉山林隱逸郡  
縣敦趣上道曹辭疾不就徵後大臣復舉應博學  
鴻儒選曹堅謝益力人高其行稱射陵先生子恭  
貽康熙庚午舉北闈授鄆陵令

揚州府

秦邵平廣陵人嘗封東陵侯秦末種瓜長安城東瓜  
有五色世稱東陵瓜

晉韓績字興齊廣陵人好文學潛退為操東土竝宗  
敬焉司徒王導辟為掾會稽內史孔愉上疏薦之  
皆不就

宋徐湘興化人有隱德不樂仕進

王伯起字興公泰州人父綸為太常博士伯起當

以恩得官讓其弟父令舉進士曰士不自重而與  
千百人旅進坐軒廡下規合有司殊可恥也閉門  
深處踰三十年仁宗英宗皆賜粟帛不強以仕

征集真州人事母孝居鄉恭謹與人未嘗校短長  
好蓄書能詩有子五人長復次賁相繼登進士第  
王安石表其墓稱為淮南善士

元高明興化人穀曾祖懷德抱道晦迹不仕子椿元  
季避地姑蘇却張士誠之聘士誠敗汚偽命者悉



為俘囚椿獨超然

明高稷字世良興化人賦性清介兄穀秩台鼎稷布衣蔬食晏如也錢溥題其宅曰明時巢許

王醇字先民揚州人早慧讀書如夙識弱冠工辭賦陸弼李維貞交相引重意不屑也善騎射擊劍曾一試京師演武場將士皆愕眙醇笑而退父母命之室以羸病辭徧游吳越佳山水參內典終於廣陵之慈雲菴

朱瓘字楚琦寶應人通尚書周禮為詩體韻適逸  
性嗜琴畜雙鶴人稱琴鶴先生景泰中詔舉賢良  
都御史王鉉薦之竟適去

吳禮字中節寶應人事母以孝稱應貢入太學母  
老不忍離人以何蕃擬之母歿遂不復仕隱居蓼  
花莊有蓼莊吟

吳敏道字曰南寶應人有異才篤內行隱居湖上  
鄉人稱舫齋先生

王錫命字蒼勅儀徵貢生遭亂隱居寶應之蘆村  
刻勵堅苦督子力耕與北平劉文昭梁以樟中洲  
崔干城長水吳鉏相友善

國朝雷士俊字伯籲其先世涇陽人居江都艾陵湖幼  
爲諸生後棄去專力於經史百家熟悉古今治亂  
所著有艾陵集貧老負氣以歿

史以甲字子仁江都人幼補諸生長乃絕意場屋  
耕讀自怡所輯有文獻通攷抄學圃隨筆勾股籌

算捷法傷寒正宗廣吳淑事類賦子炤能述父業  
著方輿縣十五卷

宗元豫字子發江都人父歿貧不能葬疏食不除  
服者十餘年性廉介不與流俗款曲惟肆力經史  
著史論數十篇別有識小錄紀廿一史中瑣事

徐州府

晉劉伶字伯倫沛人性放達與阮籍嵇康善時乘鹿  
車攜酒使人荷鋤隨之曰死便埋我土木形骸傲

然一世著酒德頌

南北朝劉遺民彭城人爲柴桑令遁跡廬山時陶淵明周續之亦在廬山謂之潯陽三隱

劉慧斐字宣文彭城人少博學能文起家梁安成王法曹參軍嘗游匡山遇處士張孝秀甚歡因居東林寺構園名離垢明釋典工篆隸手寫佛經二千卷遠近欽慕簡文臨江州遺以几杖

明秦英字子美豐人通經術洪武間屢薦賢良方正

辭疾不赴

徐明徐州人足不履城市逍遙間遠屢空晏如壽  
一百七歲

劉應元徐州人淡泊無外慕負郭有隙地種柿樹  
千章築土室以居縣令聞而召之不出

國朝閩撲豐縣人性儉素甘淡泊好讀書日坐卧小園  
中雖家無儋石而心有餘閒壽一百二歲

太倉州

元朱文德今太倉界人任太尉府長史丁父艱遂不仕扁其西齋曰可間隱居自樂

明劉顥字昂夫崇明人洪武初以賢良方正薦尋乞歸隱居不出構小樓棲其上教導鄉里後學多所引進

張名由字公路嘉定人博涉經史喜談兵歷燕趙齊魏之郊遇古人營陣戰壘輒指陳勝敗時當神廟天下尚無事人皆迂之名由獨忼慷自喜居安

亭有田數頃盡棄去為貧人迨後徭役繁重有田者率逃死名由蕭然環堵中讀書放歌人始服其先見年九十一終

沈璵字孟溫太倉人授經里中長於辨說後即其受徒處建學宮著有稽古錄崑圃文集

沈弘正字公路嘉定諸生負才不偶遂絕意仕進喜聚書所藏累萬卷雖病必手一編曰以療吾疾也天啓初命舉岩穴之才大臣疏薦謝弗起有園



十畝備水石竹林之勝詞人酒客常滿座焉

盛萬紀字無紀嘉定人好讀書立名節甲申聞變  
遂棄儒服躬耕東郊茅屋三楹植梅其前署曰友  
梅時人比之劉遺民

國朝顧其康字錫之崇明人明末棄去諸生時督學以  
賢良薦徵授浙江松陽學博不赴隱居讀書教子  
瀛秀成進士

陸坦字履常嘉定人崇禎庚午舉人明末嘗著鄉

兵議條畫甚悉會逢甲申之變與父嘉穎偕隱賣卜金閭以窮死

趙世鼎字以調嘉定歲貢明末知世將亂同高士許大達陳拱辰放飲墟墓間日出而出日入而入時稱北里三逸

侯涵本名泓字研德嘉定人岐曾子少與三兄二弟稱江左六龍涵尤以經濟自任及退隱吳市惟研精詩文究心性命之學論者皆稱其筆力老蒼

近代罕匹

通州

國朝吳世式如皋人明諸生隱居白蒲鎮之竹莊性孤傲不與人通善為樂府歌行臨歿命焚其稿友人掇拾數十章名曰竹莊殘書

江南通志卷一百六十八

欽定四庫全書

江南通志卷一百六十九

人物志

隱逸

二

安徽寧池太廬鳳潁八府滁和廣六泗五州

安慶府

晉何準字幼道潯人弱冠知名不就徵辟兄充位居  
宰輔而準散帶衡門不交人事徵拜散騎郎不起  
南北朝宋何求字子有廬江潯人清退無嗜欲除中

書郎不拜住吳居般若寺足不踰戶人莫見其面  
又寄住南澗寺隱虎邱山

梁何點求弟少不仕宋世徵為太子洗馬不就隱居  
東離門卞望之墓側永明元年徵中書郎豫章王  
命駕造門點從後門逃去竟陵王子良聞之曰豫  
章王尚不屈非吾所能致點弟印亦隱會稽世號  
點為大山印為小山

宋張漢卿桐城人監興國軍管庫與太守論事不合

即和陶潛歸去來詞歸隱三十年後宰相趙汝愚  
特薦不起

元黃信一太湖人仁宗殿試第一工詩文不樂仕進  
終老巖壑間

明吳宗洙字惟孔懷寧人隱居讀書不問戶外有詣  
門求見者堅匿不出年已踰耄猶手一編八十四  
卒著迎暉閣消夏塵談諸集

吳儁字仕富桐城人少即高隱晚年植槐於庭自

號綠牕主人有詩云懶向花黃占事業三公留與  
後人封迨四傳而孫果列卿貳

方授字子留嗜學工詩晚年入四明山中結茆而  
棲採橡栗而食著書百篇

素平字石錄宿松人性豪爽工詩文高隱西源

錢可久字思畏桐城人詩才俊逸字畫遒勁自言  
與西湖結物外交駕舟千里訪之扣舷高歌旁若  
無人



方見字惟素桐城人才名冠一時隱於湖山之間  
與詩人徐宣相倡和有古人風

國朝劉若宜字宜之懷寧人明崇禎丁丑進士歷官職  
方司甲申闖賊陷京城兩次投繯皆為家人救不  
死遁居甌山三十餘年未嘗入城市

張載字子容桐城諸生博學能詩文負氣節善弩  
射明季避流寇與父相失縋城出徧求得之力護  
以歸年四十即隱松山所居臨湖環峰松篁交蔭

釣艇蠟屐隨意所之

周岐字農父桐城人博雅好古明季貢入京屢上書言時政大司馬馮元飈疏薦叅宣督軍功授監紀推官尋謝歸隱居不出著孝經外傳行世子瑄次壁師俱力學敦行

左國材字子厚桐城人光斗季子隱龍眠山所著有易學詩學杜詩解頤竝雜著若干卷

徽州府

唐張友正歛人結廬城陽山下貞元末魏弘簡來為  
宣徽副使重其才請為披雲亭記立成酬以金帛  
不顧去

宋潘洋發字肖岩歛人淳祐中為太學生上書論史  
嵩之起復之非不報退隱潛虬山累徵不就嘗葺  
龍溪紫陽諸文撰文海天琛

曹汝弼字夢得休寧人高蹈不仕與林逋魏野齊  
名號松蘿山人

程先字傳之休寧人痛父死節於金守墓不仕學於朱子

邵悅字貞父休寧人隱蘿山精舍玩易象集方書施藥活人兩膺辟舉皆不就

汪大發字敷之休寧人淳祐間魏了翁築室白鶴山下大發負笈從之得其傳歸建平山書院教授於鄉學者稱為騰波先生

程鼎字復亨婺源人從朱松學於閩家貧甚奉母

徙居窮山卒朱子表其墓

汪漢字翰美休寧人居山中時邑遭寇難親知奔匿賊至漢諭以善道賊感服而去咸賴以免

李縉字參仲婺源人絕意科舉築室鍾山以老朱子嘗與程珦過縉講論終日盛稱其文卒表其墓江愷字伯成婺源人潛隱耽著述時婺貢楮絲民甚病之愷以書白部使者貢得蠲程旬軒嘗稱之曰欲知隱不為徒隱須看當時免貢書

范啓字彌發休寧人理宗三徵不起賜號風月處士著有雞肋錄管錐志并觀記

徐驥字伯驥婺源人學於胡宏著義易圖皇極經世發微

李偉字敬叔祁門人師同郡胡方平咸淳中任郡學賓師入元不仕嘗作經史訓註二圖

劉光字元輝歙人開門授徒五十餘年元行省差充寧國路學正不赴

羅榮祖字仁甫歙人與處士蕭蚪等同被徵鄭左  
參力為勸駕榮祖書招隱詩謝之

趙彌忠字資敬休寧人力學窮理庶使薦以官不  
就

許宗堯字子仁績溪人博通經史隱大鄣山累徵  
不就

金若洙字子方休寧人受書程若庸之門弱冠領  
寶祐鄉薦令黟江宋亡不仕隱居東園著述以老

元汪萊甫字芳卿歙人好讀易自號草窗先生虞集  
薦之詔有司辟舉不赴

孫高字元京休寧人宋時薦入太學元初歸隱山  
中自號艮山以示意杜門賦咏淒斷淪絕方回讀  
其詩歎曰持此見朱文公亦無愧矣

明胡安字伯康歙人郡守陳彥回以懷才抱德舉不  
就

羅誠輔字誠一歙人太祖駐師玉屏山以耆老召



見對稱旨欲官之不受

吳買字漢臣休寧人通五經尤精易洪武初屢徵不就

王寅字仲芳歙人少為高才生棄去遠游倣自負喜談兵工詩習禪自號十岳山人

舒遜績溪人工詩洪武中辟舉不就

王善慶歙人力學善書居環溪結室僅容膝屢召不出

鮑寧字廷謚歙人正統間御史郡守交薦辭不出  
著有天源發微辨

謝陞字少連歙人嘗宗朱子帝蜀之意作李漢書  
以蜀承漢統而列魏吳為世家新城王貽上論正  
史外更有史如兩漢書外有荀悅袁宏漢紀陳壽  
三國志外又有謝陞李漢書陞雖少攻舉子業而  
性尚恬退

金顯德字世榮休寧人博極羣書不求聞達出粟

賑饑郡邑聞於朝欲官之不就門人私謚為節孝先生

余紹祉字子疇婺源人師事黃龍光盡得其學托跡蕭寺不應有司禮召

湯守敬字彥肅婺源人明初詔舉名儒辭不就

唐世靖字介甫歙人一日讀書見先正云四股八比之外原有學問公卿大夫之外原有人物遂罷諸生為山人吟詩染翰迥然自適著三邱山人什

一草

方問孝字胥成歛人別號癯丈人亢直不肯阿世  
隱居不仕著蒼耳齋詩三十卷

吳拭字去塵休寧人性豪縱有潔癖為詩清古澹  
雋工書畫又精琴理有訂正秋鴻諸譜嘗自入山  
擇琴材故相傳有去塵琴云

國朝黃生字扶孟歙縣庠生與同學洪舫棄去舉子業  
一意著述黃有詩文集若干卷洪有離騷辨杜詩

評律

查潛字澗若婺源人為文高古性狷潔足跡不履  
都聚逋跡高湖山造其廬者不得見輒歎息而去  
好周恤鄉人至破產

吳大先字維則歙人家貧以著述為事時攜琴書  
山水間繙繹之暇輒彈一闋自娛

寧國府

晉瞿硎先生不知姓氏太和末隱宣城文脊山山有

瞿硎石因以為稱大司馬桓溫往造焉先生披鹿裘坐石室神色無忤溫與僚佐皆莫測乃令伏滔為作銘贊焉

唐元逸士宣城人居北郭杜牧許渾並有詩贈之累召不起皮日休貽書云足下行奇操峻退卧陵陽賜命屢頒高風轉固

宋程炎子涇人隱琴高臺襟負清曠文丞相天祥過之名其樓曰森翠

吳晦之字元用寧國人少謝舉業工為詩客遊江  
淮周覽名勝晚乃隱道山下築生香亭一室幽棲  
為世推重

元貢性之字友初師泰從子由國子生補閩省理官  
明初有以性之薦者性之改名悅避居會稽耕漁  
自給邑人芮麟嘗遇之邀與俱歸辭以詩云遊絲  
落絮都成恨社燕秋鴻各自飛每有所感則泣然  
泣下既卒門人私謚曰貞晦先生

梅致和字彥遠宣城人從汪澤民授春秋隱於城南  
部使者重之屢辟不起宋濂誌其墓

明林景初太平人賦性恬退洪武初求遺賢知縣梁  
德遠勸之仕以疾辭隱香城山號獨隱居士

貢鏞字元聲宣城人博洽工詩家人夜執盜鏞不  
欲識其人命勿燭盜曰苦多逋負更給布粟遣之  
居嘗力耕足不至城府

洪載字維熙涇縣人隱居嗜古遇歛歲周卹鄉黨



有鬻兒女者還其直獲盜縱之為詩有陶孟之風  
有水雲集

國朝汪作霖字雨公寧國人明經嗜古教授生徒人鮮  
知者嘗獲遺金不取見人急每傾囊予之邑人稱  
其古道云

### 池州府

唐高霽字暄之秋浦人隱居石門山桃花塢李白嘗  
游其地與同眺九華聯句

李昭象字化文池州刺史方元子方元罷池州卒  
於宣城其家遂留秋浦懿宗末昭象至長安以文  
干執政路巖深器重之後避黃巢亂入九華築室  
碧雲峰下與張喬顧雲杜荀鶴為方外交楊行密  
聘之不起

五代陶守立池陽人通經史善屬文南唐保大中棲  
隱齊山琴棋詩酒外以丹青自娛

夏鴻貴池人嘗與兄鵬輯十三代史略隱居不出

鄉人罕見其面子乾錫樊師古嘗師事之及守池  
薦於朝宋祖為製冠服召之竟不起自號清溪布  
衣時推一門高尚

宋劉放字世疎青陽人隱居九華雙峯下自題石壁  
曰清隱岩著九華拾遺一卷

陳翥銅陵人好閒靜却掃著書即家人亦非其時  
不見

陳巖字清德青陽人博極羣書負用世之志宋末

舉進士不第入元遂深自晦匿時方徵求隱逸乃  
汗漫江湖以避之及老始歸築室高陽河以居出  
則徧歷九華之勝有九華詩集

明洪仲遵名道以字行建德人通易春秋屢受辟命  
皆不就後舉文行授本縣訓導以老辭與江容等  
游號五老

劉城字伯宗貴池人歲貢生才氣豪邁與同邑吳  
應箕齊名一時名公卿多推重之好談經濟大略

著邊塞屯鹽河渠市馬諸議明季屢辭徵辟岩棲  
谷隱以終其身有嶧桐集二十卷

江杏字君培建德人歲貢生為人莊重博涉文史  
深於天文兵法揣事多奇中明亡後悔迹不出同  
里尚書鄭三俊為作傳

鮑光義貴池人工詩文明季避兵棄諸生棲隱七  
松里所輯有周易講義又建德貢生金學重少有  
才名晚歲匿跡山中潛心著述

太平府

唐王翀霄繁昌人雅志林壑不樂仕進貞元間築室  
馬仁山講學從游甚盛後尚以所隱未深更徙龍  
首峯之西

王居巖當塗人避廣明之亂棄官隱青山楊行密  
據淮南以兵迫起之一日行密大會失居巖急使  
人掩其家無一在者

宋韋許字深道蕪湖人從李之儀學不事科舉築室

榜曰獨樂陳瓘為作記黃庭堅至邑與之游紹興  
初高宗特命以官不受自號蕪陰居士

魚潛字德昭當塗人工詩有名後隱居不出養鵝  
鴨以自給

元蔣子誠當塗人文宗西幸江陵憩慈湖民舍駕旋  
後子誠族人多攀援左右以干爵祿獨子誠徜徉  
溪谷採藥吟詩以逸民終

明祖雋字遠志當塗人少有詩名永樂中徵修大典

例當得官雋辭歸放懷詩酒脩然自適著有丹湖集

戴綬字民信當塗人有孝行工古文御史及郡守交薦之授和州學正辭疾不就葺采石書院授徒以終

廬州府

元葛聞孫合肥人字景元早喪父事母篤孝嘗出為州文學既而曰此非養志之道吾有薄田勤力耕



稼亦足供養遂歸於舍傍結環翠山房以延來學  
每侍母食下始出與諸生誦說間入城識與不識  
皆曰葛先生執政薦其學行於朝召為翰林辭不  
赴及卒余闕表其墓

朱可與舒城人好學博覽絕意仕進家居教授文  
行著當時

明方自勉字聖修性方嚴不苟然諾里人比之王彥  
方隱湖濱以古學教授

宛杲字彥昭廬江人讀書通世務尤樂施予高蹈山林不樂仕進而行誼為衆所推

楊首春字元之編茅成屋匿影空山每與人講論聽者忘倦有司徃物色之已掛瓢逝矣

楊大濂字潔甫無為人高雅恬退以布衣為督學耿定向薦不就衣敕履穿灑然自適所著有詠史諸詩

鍾濟字海源字義端嚴平生未嘗一接長吏舉鄉

飲不就舍後築一園臨江面山以詩酒終其身

國朝季友賢字輔皇合肥人淹貫經史兼精六甲明末  
大司馬史可法羅致幕下父艱歸里隱于黃山

曹大復字賓魯巢縣人明諸生端方純朴究心理  
學得脩脯輒周貧困年七十慨然去鄉邑或遇之  
白石山禪林中不交一言而去計其壽已百三歲  
矣後莫知所之

鳳陽府

漢梅福字子真壽春人明尚書穀梁春秋為郡文學  
補南昌尉後歸壽春時王鳳專政福上書極諫至  
王莽亂政一朝棄妻子去後人有見福于會稽者  
變姓名為吳市門卒云

桓曄字文林一名嚴龍亢人鸞子姑為司空楊賜  
夫人初鸞卒姑歸寧赴哀整飾從者而入曄心非  
之每至京師未嘗舍宿楊氏其貞介若此賓客從  
者皆祇其志行一餐不受于人後舉孝廉有道方

正茂才三公竝辟皆不應初平中天下亂避地會稽遂浮海客交趾

元王宗岳字良佐臨淮人厭俗學隱居講求性道人稱養高先生

楊省字治卿定遠人不樂仕進以書史自娛嘗遊三峯青韭諸山遇佳處輒為題咏晚年造詣益高明盛世鳴字太古鳳陽人倣儻有蘊藉嗜古文奇字嘗寓泗州隱于卜郡守物色之奇其人無錫少宰

孫繼皋聞其詩薦之葉相國向高遊輦下名動公卿世鳴意不憚退而隱居號空谷居士

陳琰字廷玉臨淮人性恬淡博學能詩文動循禮度隱居濠濱有司累薦皆不出

許鵬字廷舉定遠人少負氣節以賢良方正薦至京師陳時務詞多過直乃于策尾作詩自陳已志不願入選歸隱城南種竹萬竿因號竹莊以耕讀自娛著有竹莊集

姚医字舜用定遠人性敏過目成誦家貧授徒不  
慕榮利大學士謝遷與其父有舊使人召之医固  
辭不赴

趙萃一字魁北壽州人養親盡孝資敏而好學隱  
居山中講明易理終身不出

國朝周廷棟號豫章宿州人博學多聞性理子史諸書  
無不精研隱居不仕工詞賦書法宗二王

潁州府

晉戴逵字安道譙國人太宰武陵王晞聞其善鼓琴使人召之逵對使者破琴曰安道不為王門伶人遂徙居會稽剡縣王徽之嘗雪夜訪之孝武帝時累徵不至

南北朝宋戴顓字仲若逵子有高名嘗註莊子元嘉中徵不就愛剡多名山隱居其下文帝每欲見之曰吾東巡日當宴戴公山下

宋陳搏字圖南亳州真源人始四五歲戲渦水岍側



有青衣媪乳之自是聰悟日益後唐長興中舉進士不第隱居華山雲臺觀周世宗好黃白術召見之搏曰陛下當以致治為念奈何留意黃白之事乎宋太祖代周搏曰天下自此定矣太平興國中來朝至中書省宋琪等問曰先生得元默修養之道可以教人乎搏曰養生非方術可傳假令白日冲天亦何益於世今聖上有道仁聖之主也正君臣協心同德興化勤行修煉無出於此上益重之

賜號希夷先生後還山端拱中卒

明王清臣潁州人天啓初潁州張遠度買田潁南地  
多桃花林一日獨游見耕而歌者聽之皆杜詩也  
遂就與語知爲清臣也有田畏徭役盡委之族爲  
人傭耕過其廬見舊歷紙背書所作其述懷一篇  
云人生如泛梗飄飄殊無根飲啄得幾許營營晨  
與昏對此春日好荷鋤出南原近觀草色數靜聽  
鳥語餘有身貴適志窮達安足論亂後不知所終

滁州

宋雍存全椒人隱居求志以文史自娛號南郭先生  
以縣有獨山晚又號獨山翁州守錢公輔曾肇皆  
與之游

元范思敬全椒人有志操能文章至正初嘗獻治平  
十二策不報遂歸隱石子岡之梁莊號棲谷子  
明駱俊滁州人平居耽味經史不求聞達行義修潔  
人多重之著有靜中自樂詩集

和州

宋何宗英和州人紹興間以布衣上書言敵必渝盟  
宜先事為備請幸建康以張國勢不報遂隱居以  
終士論高之

明杜浩字守彝和州人洪武初居南秀村力學篤行  
安貧不仕

廣德州

宋張介紹聖時人隱居城北郡守慕其名每訪以政

欲疏其行學於朝介固辭不就

趙平叔咸平時人隱居城西琴山側起一樓於翠微之間曰萬山樓吟詠自適

元盧志賢至元時人清修高節當時重之

### 六安州

宋白樸字仁甫六安人少隨父樞判真定遭元兵父子相失自是不茹葷酒人問其故曰俟見吾親乃下咽耳宋亡不仕所著有朝野新聲太和正韻天

籟集

泗州

隋趙徵君泗州人失其名讀書甓山隱居不仕鄉人於其遺址建甓山書院祀之

明李公度字思貞泗州人弱冠領鄉薦勸之仕不應部使者以國子博士薦不就

石應瑞字兆生天長人少貧困授經以養父母居家孝友中明季己卯副榜例得仕不願就選置一

厘雲水間讀書課子逍遙樂志時比之仲長統云  
國朝陳歌泰字古彈天長人順治戊子拔貢恬退不仕  
講學修行一方之中皆化為善



江南通志卷一百六十九